

De Elfde-Elfde war doo

Jetz hadde merr de Elfde-Elfde gehabbd unn doodemett fängt joo die Fassenacht immer oo. Ach was hadde merr frieher enn Spass gehabd, doomols noch im Schitzehof unn aach in de ahl Tornhall, doomols, als merr noch e bissi jinger gewese sinn als wie heit.

Ja, seet de Schorsch omm Sunndaach omm Stommdisch, dess warn noch Zeide, ihr Männer, wie merr owwe uff de Empor, im Gepäcknetz vumm Schitzehof gesotze unn Sekt gedrunke hawwe, unn wissder noch moins, doo warn die meisde schunn fort, hawwe merr mitte uff de Donzfläch gehoggd unn hawwe emm Jakob Singer soi Gulaschsubb gesse. Was sinn mir doomols ferr enn scheene Klub gewese.

Vill vumm Klub sinn schunn garnitt mehr doo, habb isch gesaat, isch denk grad onn su Daache wie ewe onn die schee Zeit mett monschem kloore Kerl.

Ja, seet de Karl, unn dess iss halt immer dess Komische, dass de Oofong vunn de Fassenacht grad in su enn Monat wie de November falle dut, wo merr aach immer onn die Doode denkt, mettem Dodesunndaach unn su.

Ess iss halt de elfde Monat, saach isch, unn die Elf iss halt was gons Besonderes ferr die Nann, was waaß isch wo dess herkimmt.

De Schorsch hott misch gestumbd. Habbderr's nitt die vorsch Woch in de Zeidung gelese, wie dess mett de Elf eischendlich iss?

Unn als mir zwaa de Kobb geschiddelt hawwe, hott de Schorsch oogefonge: Dess mett de Elf iss aus emm Middelalder, doomols, als merr all noch zimmlisch fromm warn. Doo hott die Elf ferr die gestonne, die e Sünd gedue hawwe, weil ewe grad die Zahl Elf nitt normal war, hawwe doch die zwaa Händ nitt mehr als zeh Finger. Ach gibt's nor zeh Gebote unn mir hawwe joo aach schunn immer mol gesaat, dess elfde Gebot iss was?

De Karl hott geniggd. Ja, dess elfde Gebot iss, du sollst disch nitt verwische losse. Also mussde vorher was gemacht hawwe, iss dess su?

Ja, ewe die Sünd, seet de Schorsch, also dess was nitt normal gewese iss. Doomols war die Elf aach ferr diejenische wischdisch, die nitt uff die Hohe Herrn geheert hawwe, die nitt gemacht hawwe was die wolde. Unn doo hawwe die koo Plakate mole misse wie mir, wenn mir heit uff e Demo gieh, naa, die hawwe uff irschend e Art unn Weis die Elf gezeichnet unn doo wussde die doo owwe, die doo unne fonge Krach oo. Merr waaß joo wie su ebbes immer ausgonge iss in de ahle Zeide, awwer später, als merr nitt ferr su e Sach de Kobb erunner gemacht kriecht hott, iss merr schunn emol oigesperrt worrn. Kimmt donn dess mett dene Gadde unn dem, was die onn Fassenacht oozieh, nitt uffs Selwe enaus?, frooch isch de Schorsch, merr kennt saache, dass doodemett joo aach die Herrn veraaschd worrn sinn.

Genau, seet de Schorsch, unn jetz sinn merr widder bei de Elf: Die noochgemachte Klamotte vunn dene ihrne Soldate oozieh unn dess aach noch grad omm Elfde-Elfde, dess war, su dun merr heit saache, e Provokation, awwer weil die joo die Uniform noochgemachd hadde, die die eischene Soldate oohadde, konnt merr joo nitt geesche die oogieh. Was hawwe die Hohe Herrn gemacht?

Die hawwe gelacht, seet de Karl. Was issen aach onnersders iwwerisch gebliwwe.

Isch frooch: Heit lachese aach. Awwer wie isses mette Gail, die merr halle muss?

Dess iss e onner Sach, seet de Schorsch, dess misse merr noch erauskrieh.

Eiern Honnes